

PRAWO

7885

THESES JURIDICÆ
DE

7885. Jus.

INGRATITU- DINE,

QVAS

DEO CLEMENTER ANNUENTE,
CONSENTIENTE MAGNIFICO JURISCON-
SULTORUM ORDINE,
IN ACADEMIA PATRIA,
PRÆSIDE
VIRO

Pra-Nobilissimò, Excellentissimo & Consultissimò

DN. ACHATIO CHRISTIANO
XANXEN/

J. U. D. P. P. Extraord. Celeberrimò, Consist.

Samb. Assessore Gravissimò,

Patronò & Doctore suò, nunquam satis su,
spiciendò,

Publicè disquirendas proponit

ABRAHAMUS XEXX/

Reg. Pruss.

Ad diem 23. Augusti Anno M. DC. LXXXV.

In Auditorio Majori.

REGIOMONTI,

Typis FRIDERICI REUSNERI, SER. ELECT. BRAND.
ET ACAD. TYPOGR. HÆREDUM,

977.

211. 2887

V I R O

Magnifico, Nobilissimo, Amplissimo

DOMINO

SIMONI BEHEM,

Reipubl. Thoruniensis Consuli

Gravissimo,

Fautori suo ad bustum devotissimè colendo,

Ut &

V I R O

Nobilissimo atq. Consultissimo

DN. JOHANNI Reich /

Scabinatûs Cniphofiani Vice-

Præsidi,

Parenti suo æternùm venerando,

Disputationem hanc in signum animi,
ad beneficia, unde fluunt, resluentis gra-
tâ mente offert



Auctor.

PROOEMIUM.



INter plurima, maximaq; vitia nul-
lum esse ingratitude frequentius & detesta-
bilius, nemo facile inficias ibit. Maximum
enim apud Decianum vitium audit *Cons. 686.*
Num. 12. & Ciceroni omnium vitiorum ma-
ter est *lib. 8. ad Att.* multum detestabile *Panorm. in cap. fin. X.*
d. donat. Menoch. Conf. 723, n. 2. Vasq. d. success. progress. in Praef.
n. 3. Ut non immerito Persæ gravissimam in ingratos con-
stituerint poenam, putantes, ingratos hõc ipsò vitio DEUM
majorem in modum negligere *Xenoph. l. 1.* Quomodo autem
DEUS ingrati animi vitio contemnatur *vid. Less. l. 2. c. 47.* ubi
sex gradus adducit, quibus ingrati in DEUM peccant. Non
leve quoq; Respublica exinde damnum sentit, quandoquidem
hominum conversationem tollit *D. Alexander d. Piccolb. in Inst.*
moral. c. 7. in fine, quæ tamen ad omne negotium feliciter ex-
pediendum, requiritur. Ut taceam, naturam ipsam in socie-
tatem propendere, & lege divinitus implantatam esse *Lambert.*
Dan. lib. 1. Polit. Christ. c. 3. Aristot. l. 1. p. 2. Cum igitur fre-
quentia ingratorum exempla omnium sese oculis inge-
rant, nos, pro ingenii modulò, Exercitatione Juridicâ de
Ingratitudine aliquid in lucem emittere instituimus, Effectus
potissimum illius singulares, aliaq; circa eam observanda, de-
claraturi; DEUS annue cœptis!

THESIS I.

ICtum rei alicujus tractationem suscipientem, verborum ra-
tionem primitus habere debere, monet *Ulpianus in L. 1. ff.*
d. J. & J. l. 1. §. 1. ff. de Pact. quoniam verborum ministerio
res

res omnes intelligimus *L. 7. §. 2. d. supp. leg.* Quamobrem, ne in leges Methodi peccemus, Etymologiam Ingratitudinis paucis explicabimus. Compositum autem est hoc vocabulum ex præpositione IN, quæ negativam infert significationem, præprimis quando in principio nominis ponitur *Gloss. in L. Sacril. 1. ff. ad L. Jul. pecul.* & gratitudo; accipiturq; interdum pro defatigatione aliquâ, ut apud *Terent.* opus faciam, ut defatiger eousq; ingratus, ut dormiam; quandoq; pro insuavitate seu asperitate aliquâ *Plin. lib. 11. c. 2.* quinquennium est, quod prodire, quæ vocant laurea, non ingrata amaritudinis; nonnunquam pro oblivione accepti beneficii *Terent. in Andr.* quam significationem nos modò amplectimur. Unde haud difficile est, colligere, quid sit Ingratitudo, nempe virium, quod accepta beneficia non agnoscit, non meminit, non de prædicat, ut oportet. Estq; vel perfecta vel imperfecta, hæc, quæ in omnibus, illa, quæ saltem in aliquibus horum graduum peccat.

II. Oritur ingratitude ex contemptu beneficii *Thomas cap. 27. q. 109. art. 3.* & admittitur vel formaliter vel materialiter. Formalis ingratitude est, quando beneficium vel benefactoris animus contemnitur, ut non videaris ei obnoxius seu debitor ratione beneficii; sicuti hõc modò ingrati sunt, qui beneficium vel affectum benefactoris sinistrè interpretantur, ne videantur ei aliquid debere, aut ne cogantur esse grati agendò gratias. Materialis verò est, quando absq; contemptu vel omittitur debitum gratitudinis officium, vel committitur quid contra benefactorem.

III. Quòd si ingritudinis vitium considerari nequit, ubi non præcessit beneficium *Pacian. Conf. 112. Num. 31.* objectum ingritudinis versabitur circa eas actiones, quas largitio aliqua vel remuneratio vel aliud quoddam beneficiorum genus præ-

præcessit, quibus alter alterum sibi ratione beneficii ejus devinctum atq; obstrictum reddidit. Ideo præprimis in illis spectatur, qui naturali sanguinis cognatione juncti, merito sibi invicem quævis humanitatis & reverentiæ officia debent. Interim tamen nemo erga Genitorem præsumitur ingratus *Menoch. lib. 4. d. presumpt. part. 1. pres. 29. N. 2.* Idem asserit *L. 30. C. d. Iuoff. Testament. & Nov. 115. c. 3.* nisi doceatur. Unde Impp. Honor. & Theodos. in *l. 19. C. d. Episc. & Cleric.* dicunt quod fœdus naturale in his nihil sævi criminis existimari permittat.

IV. Formam, ex quâ denominatur Effectus, constitui-
mus animum hominis, quatenus occupatur vel in non retri-
buendis, vel prorsus spernendis beneficiis. Finem, à quò res
denominatur, ponimus, ut nempe aliquis alteri agrè faciat,
radium aliquod illi excitet, ad morem animo suo gerendum,
genioq; suo indulgendum.

V. Effectus Ingratitudinis varii sunt; quoniam autem
hi alii sunt Morales & Theologici; alii, quos Jura nostra pro-
ponunt, de his, illis omissis, nobis aliquid dicendum. Et pri-
mus quidem Effectus Ingratitudinis est, quòd liberti, ob In-
gratitudinem damnati, in servitutem à Patronò revocari
possint *l. 2. C. d. libert. & lib. eorum l. 12. C. d. operis Libert.*
quod & ad filios libertorum trahunt *Honorius & Theodosius*
Impp. in l. ult. C. d. libert. & lib. eor. Licet enim libertas semel
concessa, amplius retractari non possit *§. 6. Inst. quibus ex cau-*
sis man. non licet; nihilominus tamen, quoniam libertus, in-
gratum se exhibens, erga Patronum contra communes natu-
ræ instinctus, qui ei, qui benè fecit, benè velle jubet, imò &
contrà ipsum jus & æquitatem naturalem delinquit, indignum
se libertate testatur. Nec obstat, Justinianum in *Nov. 78. C. 5.*
omnes libertinos & libertinorum conditionem sustulisse, datâ

manumissis ingenuitate; quandoquidem hoc verum est, non quoad Patronum, sed quoad ceteros & jura alia ingenuitatis; nam Jus Patronatus integrum manet, nisi Patronus in manumissione id nominatim remiserit; minus obstat, quod manumissio in Nov. 78. restitutioni Natalium æquiparetur, natalibus autem restitutus, nec obsequium vel honorem Patrono debet, nec quasi ingratus accusari potest, & sic per Consequens nec Manumissus. Sciendum enim, plenior esse Natalium restitutionem, quam manumissionem *l. 10. §. 3. ff. d. in jus vocandò*, quod fusè & eleganter diduxit *Matthias Stephanus ad Nov. 78.* Præterea putandum non est, Patronum ex quâlibet putativâ causâ libertum ingratum declarare posse, cum certæ ingratitude causæ in *L. 6. ff. d. agnosc. & alendis liber. & L. 2. C. de liber. & lib. eor.* exprimantur, nimirum hæ; (1.) Liberti Patronos contumeliâ affecerint gravi, (2.) si illatâ manu atroci eos pullaverint; (3.) si paupertate vel corporis valetudine laborantes dereliquerint; (4.) si jactantiâ quâdam cervicem adversus eum erexerint. An verò hodiè homo proprius, semel manumissus, ob ingratitude in pristinam conditionem trahi possit, non immeritò hic quæritur? Affirmativa nobis placet, si nempe ex liberali voluntate in ipsum collata libertas sit; cujus tamen ratio non ex antiquo libertinorum statu deducenda, cum proprius homo manumissione factâ non redigatur in talem statum, ut manumittentem teneatur Patronum suum agnoscere; sed ex naturâ donationis; quæ utut perfecta; ob atrocem tamen injuriam donatarii revocari potest *l. ult. C. d. revoc. donat.*

VI. Secundus Effectus Ingratitude est, quod filius emancipatus in patriam potestatem ob Ingratitude reduci possit & revocari *l. un. C. d. ingrat. lib.* quò ipsò tamen non tam acquiri patriam potestatem, quam pristinam rescissâ ob ingra-

ingratiitudinem emancipatione restitui statuimus cum *Donell. lib. 2. Comment. c. 24.* Fit autem hæc revocatio duabus potissimum ex causis (1.) propter grave convitium; (2.) ob quamvis atrocem injuriam, parenti illatam, *Habn. in Not. ad Wesemb. Tit. d. Obsequ. Patron. atq. Parent. prestand.* quibus additur à Dd. denegatio alimentorum, quæ tamen causæ allegatæ, in factis consistentes, legitimè probari debent. Ratio autem hujus revocationis videtur esse præsumpta Patris voluntas, qui prævisò ingratiitudinis casu, noluit concessâ libertate, quasi adversus se tela suppeditare; Sed nonne plus poenæ involvit, si Parens istius filii curam penitus abjiciat, eumq; pro filio non agnoscat? Minimè; quoniam per talem revocationem multa jura, filio jam concessa, adimuntur, nimirum quòd sine consensu Patris nuptias contrahere *pr. Inst. d. Nuptiis*, aut Testamentum condere nequeat *pr. Inst. quibus Testamentum facere non est permissum*, & alia. Hodie cum liberi facile emancipati censeantur, potissimum per contractas nuptias, quæ revocari non possunt, licet liberi ingrati fuerint, revocatio cessat, præprimis cum parentes ingratos & immorigeros liberos Ergastulis concredere, eosq; hæc ratione ad sanitatem mentis, humilitatem & obsequia optimò Reipubl. institutò producere possint.

VII. Tertijs Effectus est, quod Parentes ob ingratiitudinem liberorū insignem, iis alimenta denegare possint *l. 5. §. 11. ff. d. agnos. & alend. lib.* Notum quidem est, quòd Pater liberos suos alere teneatur pro modò facultatum *l. 3. C. d. alend. lib.* ita ut etiam ad talem alimentationem officio Judicis compelli possit *arg. l. 2. C. d. 1.* Alimentorum verò appellatione non cibaria tantum; sed etiam vestitus & habitatio continetur, quin & bona institutio, ut civitati aliquando inservire possit alumnus, *Perer. ad Tit. C. d. alend. lib. n. 20. l. 4. ff. ubi pupillus educ. deb.*

Pii namq; Patris est curare, præprimis ut studiis liberalibus liberi imbuantur *Struv. Exercit. 30. §. 87.* Propter ingratitudinem tamen insignem, quæ omne debitum naturale tollit, hæc alimentorum præstatio rectè denegatur liberis. Sicuti enim talis ingratitudo secundum *Nov. 115.* præstat facultatem excludendi liberos à Patris hæreditate, quæ ei naturaliter ex caritate debetur, eadem ratione ea præstat justam causam exclusionis filiorum ab alimentis paternis. Et hoc argumentum ab Exhæredatione ad debitum alimentorum in Jure nostrò procedere tradit *Job, Baptista Pontanus Tract. de Alim. c. 5. n. 2. 3.* Id verò planè impium esse putamus, quod *Hobbes c. 9. d. civit. art. 2.* integrum reliquit matri, num infantem, recens natum, exponere velit suo arbitrio, an verò educare; quorsum enim ubera concessisset puerperis natura, nisi ut officii sui eas admoneret, omninò alendum esse infantem; imò etiamsi istam alimoniam officinam non haberent matres, ipse tamen naturalis affectus & instinctus eas id præstare juberet, ad quod bruta naturæ impetu feruntur; Nam & aves, inquit *Lactantius, d. Opific. Dei c. 3.* quoniam foetus de suis corporibus alere, datum non est, cibos convehunt, & totos dies in hujusmodi discursatione consumunt, si qua ergò mulier officium id suum aut prorsus negligit, aut infantem alienæ misericordiae exponit, in ipsum jus naturæ peccat, Unde *Paulus in L. 4. ff. d. agnosc. & alend. lib.* necare, inquit, videtur non tantum is, qui partum perfocat, sed & is, qui publicis locis misericordiae causa exponit, quam ipse non habet *Ziegl. in Not. ad Grot. l. 2. c. 7. §. 4. Conf. Aymon. Cravetta Conf. 199. n. 3. Hilliger. ad Donell. l. 12. c. 4.*

VIII. Quartus Effectus est, quòd ob Ingratitudinem, donatio revocari possit, *§. 2. Inst. d. donat. & L. ult. C. d. revocand. donat.* Ut hic Effectus ritè declaretur, præmittendum dona.

donationum duo esse genera, mortis & non mortis causâ, seu inter vivos. De mortis causâ donatione circa Ingratitudinem nihil expressè disposuere Leges. De donationibus inter vivos constat, quòd eâ perfectâ temerè revocari non possint §. 2. *Inst. d. donat.* Valet enim hîc verum illud vetus proverbium puerorum, quod etiam *Plato probat in Phædô*, inquit, nos equidem dicimus, ut pueri, quòd rectè datorum revocatio sit nulla; id quod adeò placuit Romanis Principibus, ut professi etiam sint, ne suò quidem Rescriptò infringi posse donationes, ritè factas *L. 9. C. d. Rev. donat. Molina de Just. & Jur. Disput. 281.* Vera tamen sunt hæc de donationibus inter vivos dicta, si donationis acceptor, qui donatarius vocatur, gratus fuerit; propter ingratitude enim liberrimè eâ revocari possunt *L. 1. C. d. Revoc. donat.* & quidem in totum *Struv. Exercit. 40.* ne scilicet cuiquam sit licentia & alienas res capere, & frugalitatem irridere donatoris, ut loquitur Imperator Justinianus in *L. ult. C. d. revoc. donat.* justum namq; non est, ab illò injuriâ pati, cui quis beneficia contulit, cum liberalitas donantis magis ad obsequia inclinare, quàm ad insolentiam erigere debeat. Hocq; non ob quamlibet ingratitude fieri potest, sed ob talem, quæ sceleri affinis & conjuncta est, quales sunt illæ, quarum mentio fit in *L. ult. all. C. d. rev. don.* Nimirum, si (1) donatarius atroces injurias in donatorem effuderit; (2.) si illi impias manûs intulerit; (3.) si vitæ ejus insidiatur; (4.) si grandem jacturæ molem substantiæ & bonis donatoris ingesserit; (5.) si conventiones, donationi appositæ, implere nolit; Licet autem plures causas non enumeret Justinianus, atq; ob eas modò, quas exprimit, revocationem donationis permittat, communi tamen nos adstipulamur Dd. sententiæ, qui negant, similes causas ob id excludi oportere; Donatoribus porrò solis non etiam hæredibus eorum

rtim hæc licentia revocandi competit *l. 7. § ult. C. d. rev. don.* quia actio, quæ adversus ingratos datur ad revocandam donationem vindictæ cujusdam, & ultionis injuriæ Effectum habet, & ideo personalis est, atq; actioni injuriarum in hoc similis, quam constat hæredi ejus, qui injuriam passus est, non dari *§. 1. Inst. d. perpet. & temporal. action. Vinn. ad §. 2. Inst. d. donat.* Consentit Jus nostrum Provinciale Prut. *lib. 4. Tit. 14. A. 4. §. 1.*

IX. Sequitur quintus Effectus, quòd scilicet ob ingratitude filiarum Pater ipsis dotem denegare possit *Harprecht. ad §. 1. Inst. d. injur. n. 144.* Magnus aliàs est favor dotium, quandoquidem Reipublicæ interest, mulieres dotes salvas habere; propter quas nubere possunt *Paulus in l. 2. ff. d. Jur. dot.* cui ad stipulatur *Pomponius in l. 1. ff. solut. matrim.* quando ait, publicè interesse, dotes mulieribus conservari, cum dotatas esse foeminas ad sobolem procreandam, replendamq; liberis civitatem, maximè sit necessarium. Nimirum dotis constituendæ ratio in Romanorum Rep. exindè fluxisse videtur, quòd mulierem indotatam vulgò contemptim haberi, experientia doceret, quodq; amor mariti extingveretur, si pro oneribus matrimonii, quæ tam varia & gravia esse solent, ferendis nihil quicquam à Patre uxoris ipsi concederetur levaminis. Ut ergò huic malo, publicè pernicioso, remedium quæreretur, consuetudine ac moribus introducta dotandæ filiæ conditio, ex quâ deinceps mulieris intererat, ut inciperet esse dotata *l. 2. ff. d. Jur. dot.* Quòd autem ad dotem præstandam naturaliter sit obligatus, probari potest ex *l. 6. ff. d. collat.* quia Pater honestam conditionem nubendi filiæ quærere debet, ne ejus pudicitia pericliteretur, bonam autem & honestam conditionem faciliè inveniet, si se egregiè dotaturum esse filiam suam certò

certò promittat, ita, ut promissum sequatur realis numeratio; Paterni ergò officii est, filiam dotare, ita, ut & officio Judicis ad hoc cogi possit *l. 19. ff. d. Rit. Nupt.* Hinc si filius famil. mutuum pecuniam acceperit, ut eam pro dote sororis daret, pater actione de in rem versò tenetur *l. 17. ff. ad Scum. Maced.* Hanc dotationem à Parente expediendam approbat Jus Provinciale nostrum *lib. 4. Tit. 15. art. 1. §. 1.* Quòd si verò filia ingratam se insigniter testetur, illudq; legitimè sit deductum atque probatum, Pater ei dotem dare non tenetur; Quemadmodum enim propter ingratitudinem insignem legitima privari possunt; eadem ratione & dote, quippe quæ legitimam imitatur *Harprecht. loc. supr. allegat.*

X. Sextus Effectus est, quod ob ingratitudinem exhæredatio fieri possit eorum, qui aliàs necessariò hæredes erant instituendi *Nov. 115.* Exhæredationis causas olim fuisse arbitrias, easq; ex Judicis cognitione & æstimatione pependisse indicat *l. 7. in pr. ff. d. bon. damnat.* Ne verò istâ ratione injuria hominibus fieret, jure novò constitutum est, exhæredationem fieri non debere, nisi ex certis causis ingratitudinis, atq; cum elogiò, h. e. causæ expressione. Quatuordecim autem causæ enumerantur in *Nov. 115. c. 3.* ob quas Pater filios suos exhæredare potest, ne Parentum morositati nimium indulgeatur; octo verò, & sic pauciores, ob quas liberi Parentes exhæredare possunt, *c. 4.* ne liberi sint nimii morum Parentum censores. Præstat enim, ut *Aristoteles l. 1. Rhet. c. 1.* ait, quantum omninò fieri potest, legibus omnia definire, quàm Judicis arbitrio multum permittere; cùm Lex sit immota Justitiæ regula; Judex verò perversis affectibus sæpe obnoxius, qui rationem rectam in transversum abripit & obfuscat. Sed cui probatio ingratitudinis incumbit? Jure Codicis probatio hæc incumberet liberis, quâ docerent, se obsequi-

um debitum Parentibus jugiter adhibuisse, ut apparet *ex l. 28. C. d. inoff. Testam.* Jure verò novissimò probatio hæc specialiter ab hærede exigitur, non ab exhæredatò; quod approbat Jus Provinciale nostrum *lib. 5. Tit. 5. Art. 1. §. 9.* eò quòd præsumptio sit pro unoquòq; eum esse bonum, donec probetur contrarium, quæ præsumptio transfert onus probandi in adversarium, qui allegat & intendit aliquem esse malum. Quòd si verò testator plures exhæredationis causas expresserit, eò casu non est necesse, ut hæres probet, omnes esse veras, sed sufficit, si probet unam illarum, & ita decidit Imperator in *Novell. 115. c. 3.*

XI. Præterea acerrimè controvertunt Dd. an præter causas exhæredandi, in *Nov. 115.* allegatas, adhuc aliæ dentur? Affirmativam quamplurimi tenent, ut *Fachinaus lib. 6. controvers. c. 78. Sicbard. ad Auth. Non licet C. d. liber. præterit. Scheidewin. ad Tit. Inst. d. exhæred. lib. Gudelin. de Jure Novissimò lib. 2. c. 8.* quos sequitur *Hahn. in Not. ad Wesemb. Tit. d. lib. & postb.* nec sine ratione; quia (1.) omnes casus legibus comprehendi non possunt; (2.) quia dari possunt exempla similis maleficii v. gr. si filius quidem non accuset Patrem criminis, sed testimonium contra ipsum dicat, vel advocacionem exerceat. Unde etiam *Scotanus in Examine Juridicò ad Tit. de exhæredatione lib. qu. ult.* statuit plures esse exhæredandi causas, non quidem totò Genere distinctas, sed sub hisce Generibus contentas; Dissentit quidem *Molina d. Just. & Jur. Tr. 2. Diss. 175. & Giphani. ad Authenticam non licet C. d. lib. præteritis* quatuor argumentis; ad quæ tamen faciliè responderi potest.

XII. Septimus Effectus Ingratitudinis est, quòd legatarii ingrati legatum relictum amittant *l. 9. §. 1. ff. d. bis, quæ ut indignis*

dignis auf. Cùm enim in merâ & nudâ voluntate legata constant, dubium non est, quin probata voluntatis mutatione, ademptum censeatur legatum *l. 3. §. ult. & l. seqq. ff. d. adim. & transferend. leg.* Et hæc mutatio non tantum expressè probari potest ex verbis contrariis; sed & tacitè ex factis benevolæ voluntatis, mutationem inducentibus, veluti si insignis ingratitude legatarii, quæ inimicitias graves inter testatorem & legatarium operatur, intercesserit, quoniam beneficiatus efficitur hostis illius, qui contulit gratiam, & nemo præsumitur beneficium exhibere velle ingrato *Cardinal. Tusch. Lit. I. Conclus. 112.* Unde petenti huic legatario obstat exceptio doli ex nudâ eâq; præsumptâ contrariâ voluntate *arg. l. 4. §. 10. ff. d. doli mal. & met. except.* Huc referendæ sunt donationes mortis causâ, cum ad exemplum legatorum ferè per omnia sint redactæ *§. 1. Inst. d. donat.*

XIII. Milites omnes omninò esse, qui sacramentum dixerunt, dicit Grotius *lib. 3. c. 21. §. 15. L. unic. ff. d. Bonor. poss. ex Test. milit.* Cum quò concordat *Salmasius, d. Re Milit. Rom.*, milites propriè eos esse dicens, qui in matriculâ auctoritate Principis scripti, & publicò signò vocati, armis cinctis à signis non recedere jurârunt, *L. 42. ff. d. Testament. Milit. & L. 2. ff. d. Veter.* Hujusmodi militibus insignia privilegia in LL. passim concessa videmus; quæ vel ad actûs eorum inter vivos, vel ad ultimas eorum voluntates pertinent; Unde & ultima voluntas militum, quomodocunq; ea reperiatur, valet *Princip. Inst. d. Milit. Testam. tot. Tit. ff. d. Test. Milit. L. 9. ff. d. Jur. immunit. L. ult. §. pen. ff. d. mun. & bon.* Quæ privilegia illis concedebantur ideò, quia non ob propriam, sed ob publicam utilitatem maximos labores & durissimas molestias suscipiunt, seq; mortì, quam omnes naturâ refugiunt, in-

star victimæ obijciunt; hæcque privilegia adhuc hodie facta, sectaque consistere, asserit. *Nobiliss. Dn. Kupner in Dissert. d. for- 121.* Licet autem à militiâ non temerè sint avocandi milites *L. 3. §. 6. ff. d. Test.* non tamen privilegia eousque extendenda sunt, ut liberè metas officii sui vel honestatis egrediantur, hinc libertinæ conditionis etiam militantes si ingrati doceantur, in servitutem procul dubio reducuntur *arg. l. 4. C. d. libert. & eor. lib.* Non enim permittendum est privilegiis uti nocentes *Nov. 17. c. 5.* obeandem quoque causam ingratitudinis militem cingulo & honore militiæ spoliari posse affirmat *L. 1. ff. fin. & ibi gloss. ff. d. Obsequ. parent.* Et hic octavus est ingratitudinis Effectus; *Conf. Harpr. ad §. 1. Imper. 144.*

XIV. Nonus Effectus est, quod Patrono ingrato adimatur jus succedendi liberto ab intestato *l. 19. & 11. ff. d. jur. Patron.* Scilicet intestato liberto mortuo lex duodecim tabularum primum hæredibus suis deferebat hæreditatem, si hi non fuerint tunc patrono *pr. Inst. d. Success. libertorum.* Ubi primò jus vetus Legis XII. Tabularum, secundò Prætorium, tertio Legis Papiæ, quartò novarum constitutionum, sublatò Jure veteri recensetur, quibus diu immorari operæ pretium non est, cum hodie vix aliquem usum habeant.

XV. Decimus Ingratitudinis Effectus Beneficium competentiae concernit, quod debitoribus nonnullis concessum, ut non ulterius conveniri possint, quam salvo statu & dignitate suâ facere possunt, i. e. ut retineant tantum ad necessaria vitæ subsidia, quantum opus habent; Unde hoc ipsò succurritur debitori contra intentatam executionem, ne scilicet alimenta ei auferantur *Carpz. in Process. Jur. Tit. 25.* adeò, ut, licet in ipsò executionis actu per modum exceptionis opponatur, executio ista temperari debeat, donec à Judice pro qualitate

litate debitoris personæ certum quantum ei determinetur
Matth. Coler. d. process. Execut. p. 2. c. 3. n. 120. quod benefici-
um ob solam commiserationem & illis competere, qui bonis
cedunt, testatur *Marquard. d. Jur. Mercat. Lib. 1. C. 14. & §.*
ult. Inst. d. Act. l. 4. d. Cess. bon. quando nempe ad pingvi-
orem fortunam pervenire & conveniuntur. Gaudet be-
neficiò hōc & filius, *l. 17. & 30. ff. d. Re Jud.* quia Parentes li-
beris alimenta debent, & pietas parentum excussionem ad pe-
ram & faccum non permittit. Hocq; insigne beneficium,
perdunt liberi, cum ingratos se præbent *Schrader. d. feud. p. 9.*
c. 4. n. 9. Quando enim filii se non gerunt, ut filios decet,
nec Parentes id observare tenentur.

XVI. Undecimus Effectus conspicitur in retractandâ
acceptilatione *Schrad. l. cit.* Acceptilatio autem est liberatio
civilis aut imaginaria solutio, quæ fit, quando creditor ad in-
terrogationem debitoris, utrum debitum habeat acceptum,
responsione suâ, remittit *L. 1. ff. de Accept.* Et fit vel simpli-
ci stipulatione, per quam sola verborum obligatio tollitur *§. 1.*
Inst. Quibus. mod. re. contrab. oblig. & L. 8. ff. d. Accept. vel
Aquilianâ, quâ quævis obligatio & persecutio prius in verbo-
rum obligationem transfusa, tollitur *L. 13. ff. d. Accept. L. 15.*
C. de Transact. Per hanc acceptilationem sive totum sive
pars debiti remittatur, renunciatur juri competenti, atq; ita in
debitorem beneficium aliquod confertur. Hinc regulariter
remittentibus jura sua non est dandus ad ea regressus, *arg. L.*
14. §. 9. ff. d. adilit. Edict. & quod semel placuit, amplius dif-
plicere non potest. Nihil tamen obstare dicimus, quin ab
illō, qui se ingratum præbuit, erga acceptilantem, acceptila-
tionis beneficium retrahi possit *Schrader. d. feud. p. 9. c. 9. n. 9.*
Idem de pactō de non petendō aliq; liberatione, gratis factâ,
dictum volumus,

XVII. Duodecimus Effectus est, quòd Ingratitudo legitimationem annihilat. Communiter Legitimatio favorabilis dicitur, quam largè interpretari debemus *Gail. 2. obs. 142. n. 6.* Cùm enim liberi illegitimi sine suâ culpâ sultineant ignominiam, & alias vel pœnas vel effectûs illegitimæ suæ nativitatis & quodammodò pœnas libidinis suorum Parentum, Leges cum illis commiserationem habent, & natalibus eos de facili restituunt. Legitimatio verò est actus, per quem liberi naturales fiunt legitimi *§. ult. Inst. d. Nupt. Nov. 18. c. ult. Nov. 78. c. 4. Nov. 74. Nov. 89. c. 6.* Et fiebat olim tribus modis per oblationem curiæ, subsequens matrimonium & per Rescriptum Principis; hodiè autem tantùm duo posteriores modi in usu sunt; Quando jam Pater filios suos naturales legitimat per sequens matrimonium, æquali hi jure gaudent cum liberis reliquis, ex justis nuptiis procreatis, quandoquidem matrimonium subsequens ad tempus liberorum retrahitur, & omnem maculam præcedentem tollit *c. 5. X. qui sint filii legitimi*, adeò, ut testimonium natalitium ipsis dari possit, ac si ex legitimò matrimonio essent procreati *Carpz. p. 2. c. 6. d. ffs.* Hoc autem insigne beneficium legitimisationis nullum facit ingratitude liberorum legitimatorum, adeò, ut & ob eam ad pristinum statum naturalitatis vel ad pristinam illegitimationem reducantur *Schrader. L. C. Suarez. comm. opin. lit. L. n. 103.* & habeantur pro non legitimatis *Gerard. sing. 1. n. 3. Hypp. Marsil. singul. 413. n. 3.* ubi ait, quòd æquiparentur Patronus erga libertum & Pater erga filium legitimatum.

XVIII. Decimus tertius Effectus est, quòd propter ingritudinem privilegium exemptionis adimatur; Est aliàs Exemptionis beneficium etiam satis amplum, id quod varii ejus Effectûs ostendunt *Vid. May. p. 3. Decis. 130. & 152.* modò
legi-

legitimè id fuerit obtentum. Petendum enim est à summa potestate, quæ sola potestatem habet legem ferendi *arg. L. 1. ff. d. Constit. Princip.* de cujus potestate disputare instar sacrilegii est *L. 3. C. d. crim. Sacrileg.* Hinc quoq; non facile privilegia concessa retractantur *C. beneficium d. R. I. in 6to*, nisi illi, quibus concessa sunt vitio aliquo, ea fortè coinquinaverint. Inter hos privilegiò exemptionis spoliandi modos & ingratitude refertur, propter quam ingratum hoc beneficium jure adimi posse asserit *Schrader. L. C. quia ingratitude impedit gratiam Marfil. L. cit. n. 4.*

XIX. Progredimur ordine ad decimum quartum Effectum ingritudinis, qui se exlerit in retractu gentilitiò; Notum est, quòd liberi à Parentibus alienata Jure quasi propriò seu proximitatis & sanguinis ex dispositione legis vel consuetudinis, non tantum iis adhuc vivis, sed & mortuis jure protimiseos revocari possint, quia satis lugubre crebrisque lacrymis deplorandum est, videre paternas & avitas domus atq; antiqua majorum prædia transire in extraneas familias *L. 22. C. d. administr. tut. vel curat.* Quod & jure Divinò approbatum *Levit. 25. v. 25. Jer. 32. Ruth. 1. 4.* & à Fridericò in Constitutione de Jure Protimiseos, ut & statutis locorum & Provinciarum receptum; velut in Bavarià *Jus Provinciale Bavar. Tit. 10. per tot.* in nostrâ Borussiâ *P. L. R. lib. 4. Tit. 1. art. 1. per tot.* Hoc jus filium ingratum amittere patet ex *Constitutione Friderici allegatâ vers. licet autem supra.* Indignus enim Juris retractus beneficiò reputatur *arg. L. 37. §. 1. d. Minor. c. 14. X. de Usu,* sive ipse realiter vel verbaliter venditorem Parentem offenderit, sive per alios offendi curaverit; licet autem causæ quædam ingritudinis in allegat. Constitut. Frid. versicul. recenseantur, iisdem tamen similes vel graviores ex arbitriò prudentis Judicis admittendas esse putamus.

XX. De-

XX. Decimus quintus Effectus ingratitudinis est, quod propter eam Vasallo feudum auferri possit 2. *feud* 23. & 24. §. 1. quod sine ratione constitutum non est; Notum namq; est, quod Vasallus Domino ad fidelitatem sit obstrictus, adeo, ut fidelitas sit de Essentiâ feudi, quæ nec pactò remitti potest *arg. L. 9. §. 3. ff. ad exhib.* Quando jam Vasallus hanc fidelitatem omittit, indicat se feudum amplius habere nolle, quapropter jure meritò id à Dominò aufertur; Causæ autem ingratitudinis variæ afferuntur à Feudistis, quæ consistunt vel in commit- tendò vel in omittendò *Rosenthal. c. 10. conclus. 1.* In commit- tendò, quando Vasallus Dominum factò improbò graviter of- fendit h. e. vel injuriis realibus, vel gravibus verbalibus, sive per se, sive per alium; An verò Vasallo feudum auferri pos- sit, si manum saltem quasi percussurus levavit, non tamen per- cussit, admodum controvertitur? Et licet quidem injuria hæc quædam sit per *L. 15. §. 1. ff. d. Injur.* non tamen tantæ atroci- tatis esse videtur, ut propterea Vasallo feudum sit auferendum *Schnobel Disput. feud. 10. Th. 8.* In omittendò ingratitudo con- sistit in hoc, v. gr. si justò tempore renovationem investituræ petere neglexerit 1. *feud. 22.* si requisitus servitia præstare noluerit, de periculò, quod personæ vel bonis Domini imminere, scit, Dominum cum posset, non maturè certiore reddiderit, peccatur enim & his in casibus contra fidem, semel datam. Probanda autem est, antequàm feudum aufertur ingratitudo, quippe quæ in factò consistit; Ubi notandum, quod, licet in ore duorum & trium consistat omne verum, nihilominus ta- men circa privationem feudi ad ingratitudinem probandam præcisè quinq; testes summæ & integræ opinionis requirantur 2. *feud. 57. Gail. 2. Obs. 167.* Unde sequitur Vasallum ob com- missam ingratitudinem non ipsò jure, sed, sententiâ latâ, feu- dum amittere 1. *feud. 21.* 2. *feud. 57.*

XX. Tan-

XXI. Tandem Dissertationi huic finem imponentes, ut multa paucis complectamur; ingratus & jus & nomen tam filii, quam Patris, nec non jus sepulturæ paternæ amittit. Amor enim, nisi foret ingratitude, esset invictissimus, quæ sola amorem vincere, extinguere ac evellere potest. *Ascan. Clem. C. V. n. 67.* Ob eam quoq; militem, cingulò privari, Doctorem degradari, Advocatum salariò suo privari, Clerico beneficium eripi posse tradit *Marsil. sing. 413.*

Pro limitatione prædictorum omnium notandum est, quòd per reconciliationem omnimodam tollatur ingratitude, quæ inducitur per poenitentiam subsequutam & per gratitudinem supervenientem.

Ingrata mentis vitium est consumere sumptus,
Quos largâ pietas mente paterna facit,
Et trahere ignavam captata per otia vitam,
Nec specimen studii ponere forte sui.

Ingrati crimen declinas, quando politâ
Ingratis lingvâ debita jura doces.

Sic *gratum* patriæ, sic *gratum* utriq; Parenti
Te, Reichî, præbes, juridicoq; foro.

Propterea & *grato* Tibi Patria *grata* datura
Est quondam, studiis munera *grata* tuis.

Quod Nobiliss. Dno Disputationis hujus Autori,
& Auditori suo hætenus admodum industrio,
feliciter præfagiens, precatur

PRÆSES.

Eo mißt du/ wehrter Freund/ noch vor dem Abschied weisen/
Wie dich Undand/bahrkeit noch nicht besieger hat?
Dein durch/ aus/ flug Papier das junger Blat auff Blat
Was an dir künfftig muß der Reid/hart selber preisen:
Dein Wachen Tag und Nacht/ dein Lesen/ Schweiß und Reisen/
Dein unermüdter Fleiß/ und wodurch in der Welt
Die arme Menschligkeit das höchste Gut erhält/
Legt keine frembde Wache in ihrem Dienst in Eisen;
Nein! Nein die Frucht hievon soll Gott/ Fürst/ Vater/ Land
Vey Sturm und Sonnen/Schein/ bey Krieg und Friedens/ Stand/
Bon

Von deiner Danckbahrkeit zu seiner Zeit geniesen;
Drumb wenn die Zeit ohn Danck die Welt und alles fälle;
So wird dein Ruhm zum Danck den Sternen zugesellt:
Weil du von Undanck hast so woll zu schreiben wissen.

Diese wenige Zeilen hat dem Hn. Authori und Respon-
denti dieser Disputation, seinem höchstgeliebten sehr
wehrthen Freunde / zu schuldigen Ehren wolmeinend
so willig als schuldig beyfügen müssen

J. S.

Divitis ingenii dum profers dogmata Reichi,
Divitis egregium nomen & omen habes.
Dumq; animi exponis solidè quæ commoda grati,
Teq; Tuamq; manet gratia multa Domum.

Pauca hæc Nobiliss. Domino Autori Amico suo
dilectissimo in sinceri affectûs tesseram addit
GEORGIUS PRUSZYCKI, Reg. Pruss.

Quid jure possis, arte vel arduâ
Docti Cleanthis, discupis edere,
Dilecte Reichi, Stirpis ingens
Gloria, tamq; Spes Parentum.

Belle! ministrum fulminis alitem
Impressa virtus non secus allicit
Ad magna commonstrantenisûs
Insolitos patrio vigore.

Celata virtus nomen inertiae
Foedum meretur. Tu bene pulpita
Conscendis indignante frustra
Invidiæq; fremente dente.

Felix sit ausum, quod movet insita
Virtus & usus procreet uberes,
Ne nocte non exemptus atrâ

Sidera vertice fulva tangas.

Hæc pauca ex animo amicissimo Nobilissimo atq; Do-
ctissimo Dno Respondenti Disputat, hujus Auctori
apprecari voluit

JACOBUS BEHEM Thorun. Prussus,
Phil. & Juris Stud.

35):(0):(56,

